



wantok


Niuspepa bilong ol Papua Niugini stret

NESENEL

Namba 219


Bilong wik i stat long Sarere, 20 Me 1978

Prais 10¢.



Veronika Williams poto.

ASAO GRAMIM



Poto long lephan i soim tripela man bilong PNG i skul long Australia long was o lukaut long ol klaut na ren samting. Man i sindaun em Mista Pelei Sam (bilong Babaka Viles), na man namel em i Patroul Kamai (bilong Ambunti, Is Sepik), na Albert Adami (bilong Ariangon, Madang Provins).

.Ol i skul inap 13 wik long olkain pasin bilong glasim ol klaut na win na samting olsem. Em i bilong helpim ol balus na ol sip na ol fama.

Australian Information Services photo; Patrick McArdell i kisim.

Poto daunbilo i soim Mista Alos Yagas, wanpela brotkas opisa bilong NBC long Moresby i skul moa long pasin bilong wokim olkain program bilong ol skul. Em i tren inap 15 wik wantaim 10-pela arapela edukesen brotkas pipel bilong Ghana, Nigeria, Seychelles, Botswana, Thailand, India, Malaysia, na Filipin Ailan. Meri long poto em Misis Nancy Almario bilong Filipin Ailan.

Australian Information Service photo; Barry Le Lievre i kisim.



wantok
Newsweek's Weekly in Pidgin

National weekly in Melanesian Pidgin.

Editorial Officers:
 P.O. Box 1982
 Boroko

Phone: 25.2214
 25.2552
 Telex: NE 22213

Branch Offices:
 Wewak
 Phone: 86.2479

Wabag
 P.O. Box 111
 Phone: 57.1018

Advertising:
In P.N.G.
 Ms. Penny Donald
 Phone: 25.2214

In Australia:
 Peter Halse Associates
 King York House
 32 York Street
 Sydney (2000)
 Phone: 29.7527
 Telex: 221. 409

Subscription Rate:
 Annual: K8.00.



WANEM SKEL BILONG SKELIM LIDA?

Wanem samting i mekim man o meri i kamap lida? Lida tru em husat? Em i wanem kain man-meri?

I no longtaim i go pinis Praim Minista i bin kirapim toktok long lo bilong ol lida na planti taim moa nau em i bin autim gen dispela tingting bilong em.

Long neks Mande (22 Me) Palamen bai kibung gen na Mista Somare bai bringim dispela lo bilong ol lida i kamap olsem mosen insait long palamen.

Mista lambakey Okuk na olgeta man long Oposisi grup bilong em i tok bai ol i rausim dispela mosen, na ol bai rausim Somare olsem praim tu. Long wanem Mista Somare i bin tok, sapos mosen bilong em i pundaun long palamen, em i pinistaim.

Tude planti bikman na memba bilong Palamen i paitim planti tok long dispela aidia: wanem samting tru i mekim man o meri i lida.

Na nau tasol wanpela nupela eksampel i bin kamap. Em long Mista Leo Morgan, wanpela save-man i klewa moa na i kamap long Not Solomons. Em i bin holim tupela bikpela wok bilong gavman. Pastaim em i Hai Komisina bilong PNG long Nu Silan. Tasol gavman i bin rausim em bihain long wan yia samting. Orait, bihain liklik em i kisim narapela bikpela wok olsem seketeri bilong ol publik yutiliti. Tasol ol i bin rausim em long dispela wok tu, bikos kot i bin tok long tripela taim em bin yusim pawa bilong em long kisim kain kain gutsamting bilong em yet.

Orait, nau wanem samting i kamap? Gavman i ting long givim em wanpela nupela wok gen, olsem hetman bilong wanpela nupela dipatmen bilong bosim ol taun. Kabinet yet i tok i no gat wanpela lo egens long mekim olsem. Na Mista Somare i bin tok, em bai toktok wantaim Minista bilong dispela dipatmen, em Mista Thomas Kavali, na wantaim Mista Rabbie Namaliu, em siaman bilong Publik Sevis Komisin. Bihain bai em i autim tingting bilong em yet.

Mista Namaliu na Mista lambakey Okuk, na Publik Sevis Asosiesen, na namba tu lida bilong Oposisi Mista Martin ToVadek - olgeta ol i egens long givim nupela bikpela wok long Mista Morgan. Na Ombudsman Komisin tu i kalap nogut tru.

I luk olsem sampela bikpela man long gavman i ting na tok olsem: "Dispela man i klewa moa, i smat moa. Nogut em i lus long wok gavman. Maski sapos man i pundaun sampela taim. Mipela bikpela man inap pogivim na lusim ting long kain liklik samting olsem."

Tasol sampela arapela bikman long gavman i gat narapela tingting. Yes, ol tu i laikim ol man i smat na klewa na i win moa long save. Tasol em i no inap. Man ya i mas stret tu na i mas bihainim stret-pela pasin long wok bilong em.

Sapos yumi gat gutpela lida, yumi gat gutpela kantri. Orait, mipela i askim gen: yu ting gutpela lida em i wanem samting?

OL PRIMIA KIBUNG

Long de namba 8 bilong Me, ol primia na interim primia na hetman bilong ol 20 provins i bin kibung namba wan taim insait long nupela Kaunsil Bilong Ol Provinsal Gavman Primia. Em ol i bin mekim long Kavieng long Nu Ailan inap wan wik stret.

Long dispela miting Praim Minista, Mista Michael Somare, i bin autim sampela dispela tok long ol deliget:

"

"Mipela i mas lukaut bai ol provins i wok gut wantaim na i no gat pait i kamap namel long wan wan. Sapos trabel i kamap, ol i no ken go long kot. Mipela i laik bai ol i stret-im insait long dispela kaunsil yet.

"

"Nau mipela i gat 10-pela provinsal gavman na sampela i no bin gat ileksen bilong ol yet. Ol arapela provins ol i wokim konstitusen bilong ol wan wan yet.

"

"Ol provins i mas lukaut gut, ol i yusim mani olsem wanem. Bikpela askim oltaim, na namba wan askim i mas dispela: Ol dispela mani bai helpim hamas pipel? Olsem na wan wan provins i mas mekim gutpela baset na tingting gut long pasin bilong yusim mani ol i save kisim. Na bikpela samting - ol provins i mas taitim bun long helpim ol pipel long ples, ol pipel longwe na ausait long ol taun - bai ol tu i ken go het gut.

"

"Wanpela nupela wari i bin kamap long ol provins, em i dispela pasin bilong wan wan provins i singaut na i kisim helpim long ol ausait kantri. Na tu ol pasin bilong yusim mani i paul nabaut liklik. Sapos yumi no stretim ol dispela wari, bai provinsal gavman i painim taim nogut."

YUNIVESITI PAIT


Long Fonde, 11 Me, Praim Minista na Minista bilong Plis, Mista Michael Somare, em i stap long bikpela kibung bilong olgeta primia long Kavieng, i salim wanpela strongpela tok i kam long ol studen bilong Yunivesiti long Port Moresby. Long maus bilong hetman bilong yunivesiti, Mista Renagi Lohia, em i tok olsem: "Sapos ol studen i no pinisim straik bilong ol inap long 6 klok long Fonde apinun, em bai tokim Mista Lohia long pasim Yunivesiti olgeta na salim olgeta studen i go bek long ples bilong ol."


Stat long Mande ol studen i bin straik - ol i no go long skul na ol i pasim olgeta rot nabaut long yunivesiti na i no larim ol tisa na pipel i go i kam. Ol i mekim dispela pasin kros bikos ol i bel nogut long kaunsil bilong yunivesiti i bin rausim wanpela studen, Mista Vinsen Toli-

man, inap long 2 yia bikos em i kirap paitim wanpela tisa long taim bilong skul.

Long Trinde kaunsil bilong yunivesiti i kibung na i no laik senisim dispela kot bilong ol. Olsem nau ol sampela studen i belhat na i kirap na i tromoim ston na stik long ol kaun-

sila taim ol i pinisim miting na i ran i go long haus bilong bosman bilong yunivesiti, Mista Renagi Lohia. Ol stik samting i katim het bilong bosman na tupela kaunsila, na 13 plisman bilong yunivesiti i kisim bagarap - wanpela i bagarap nogut tru na stap yet long haus sik. (long 20)





MASKI MINISTA BILONG BOSIM OL SIOS

Dia Edita - Hia mi laik bekim pas bilong brata ya Lukas Hausing. O yes Lukas Hausing mipela i amamas long ritim nius bilong yu i kam long Wantok nius. Long Sarere, 1 Epril 1978. Toktok bilong yu em i go olsem: Long lukluk bilong yupela sampela katolik i laik bai i mas i gat wanpela minista bilong lukautim sios, laka?

Orait brata, nating tok bilong yu i no stret bilong wanem mi tokim yu olsem? Yu save wok politik, na wok bilong sios i no wankain. Yu save olsem wanem go pas bilong olgeta sios em Jisas Kraus.

Taim Jisas i kam i stap long graun, em i no go insait long wanpela politik, nogat. Em i abrus long olgeta samting bilong politik. Lukas Hausing sapos yu gat baibel, kisim na opim na lukim Jon. 6: 14 na 15, bai yu save gut. Jisas i go insait long wanpela politik o nogat, o yu ken lukim tu Luk 20:20-26. Na bai yu save ol sios i bihainim Jisas o ol i mekim samting long laik bilong ol o ol i mas singaut long wanpela minista bilong strongim ol.

Yu save ol sios i gat pawa bilong God. Ol sios ol i ken pre na helpim ol minista bai ol i mekim gutpela wok bilong lukautim yumi. Lukas Hausing, dispela tingting bilong yu em olsem wanpela pikinini i laik pundaun, singaut long man bilong helpim.

Gabriel Gim,
Kimbe.

PLISMAN BEKIM TOK

Dia Edita - Hia nau mi laik bekim pas bilong Wantok hia nem bilong em Tiakamanida Patage Wasi bilong Kundis Viles, Wabag long Enga Provins. Nau em i wok long Buka. Em i bin rait i go long Wantok long 18 Mas 1978.

Na em i bin toktok long tupela plisman i stap long Anditale na em i tok tupela i drink bia long blak maket na tupela i no mekim wok gut. Em hia mi laik bekim toktok bilong wantok ya nem bilong em Wasi.

Yes wantok taim yu kam lip long ples bilong yu long Kumdin na yu traim soim bikhet bilong yu long tupela plisman i stap long Anditale na yu tok yu wanpela plisman bipo. Olsem na yu kam lip na tupela plisman bilong Anditale. Tupela i mekim wok bilong tupela na yu laik traim soim save bilong yu. Traim soim bikhet bilong yu na mitupela bin askim yu long stopim wok bilong plis. Na mitupela bin kotim yu na yu baim kot long K100 na yu belhat na yu rait i go long Wantok. Na yu toktok nabaut long samting mitupela i no bin mekim rong long en na yu yu tok.

Yes yu tok olsem yutupela i no laik wok na risain na i go long Simbu na lukautim pik. Mi tokim yu, bipo yu wok long plis. Tasol yu i no fit long wok long plis fos. Yu i go gen long wok nabaut long painim pipia long Bougainville. Yu tok nabaut. Ating mobeta yu kam bek long Kudin na lukautim pik i stap long Ambun.

Em tasol mi bekim pas bilong Wantok hia. Yu lukim na yu wari liklik, rait i go long Wantok Niuspepa na mi ken lukim.

Alois S. Gano,
Wabag/Enga

NO SPETIM SIMEN

Dia Edita - Mi laik putim dispela wari bilong mi i go long Wantok Niuspepa.

Yes, mi yet mi save lukim long Madang ol manmeri bilong ples ol save i kam long maket long salim kaikai. Tasol ol save i kam slip long arere bilong Saina stua long simen. Na ol manmeri ol save kaikai buai na ol save spetim o trautim buai long simen long ai bilong stua bilong

Saina o long maket ples.

Na tulait moningtaim ol manmeri i kirap i go pinis na ol arapela manmeri ol i laik baim kaikai na i kam long maket. Na raun raun i go, i go, na tuhat nogut tru na hat long ol. Na ol i laik sindaun, na ol i sindaun antap long buai na bagarapim dres bilong ol long spet bilong buai. Em i no gutpela pasin. Maket em i pablik ples bilong yumi olgeta. Yumi mas sevim taun bilong yumi maski long bagarapim maket na taun.

Yu kaikai buai orait traim na opim ai bilong yu na lukluk na lukim i gat rabis dram i stap. Ol taun Kaunsil i rerim pinis na i stap. Em tasol. Yu husat man laik bekim, orait rait tasol i go long Wantok Niuspepa. Mi bai amamas tasol long ritim o lukim. Tenkyu.

Erowe Ketia,
Madang.

Salim ol pas
i kam long:
**WANTOK
BOX 1982
BOROKO**

KRISTEN NOGUT BEKIM PAS

Dia Edita - Mi laik bekim pas bilong poroman ya Joe Melin bilong Boku long Not Solomon Provins. Em poroman ya i bin toktok long Wantok Niuspepa long Sarere, 11 Mas 1978. Olsem Not Solomons em i kristen kantri na pasin bilong kilim dai man, mipela i no inap lukim long Not Solomons.

Yes wantok, mi amamas tru long ritim dispela pas bilong yu. Tasol sampela tok yu bin toktok long en i no stret tumas long tingting bilong mi. Namba wan samting mi laik save yu minim olsem wanem Not Solomons em i kristen kantri? Long Buk Tambu i tok yu yet, yu i no ken putim yu yet yu kristen. God tasol i save husat i

gutpela kristen na husat i kristen nogut.

Namba tu yu tok pasin bilong kilim dai man mipela i no inap lukim long Not Solomons. Bikos ol pipel bilong dispela hap i no save pait na ol i no save kilim dai man. Poroman, mi ting yu wanpela mauswara man tru ya, laka? Long wanem mi yet mi bin harim nius long redio osem ol man bilong ples Hanalis long Smol Buka yet ol i bin kilim dai tupela man 'olsem pik na dok. Em long papa na wantaim pikinini man bilong em. Na tupela ya i dai pinis. Poroman bai yu tok wanem long dispela?

Na i no long taim mi bin harim gen nius long redio olsem. Wanpela man bilong Buin em i laik mekim pasin nogut wantaim pikinini meri bilong em yet. Tasol pikinini meri em i no laik na papa bilong em i kisim bikpela naip na i katim em olsem pik. Na pikinini meri bilong em i dai olgeta.

Dispela ol samting i bin kamap yet long hap bilong yu na yu mas sem long dispela. Na ating yu i no tingting gut pastaim yu rait i go long Wantok, laka?

Na long pinisim hap pas bilong mi, mi laik tok olsem yu Joe Melin na mi, yumitupela o wanem kain man long dispela graun i no save wanem kantri em i trupela kristen na wanem kantri i kristen nogut. Em tasol hap pas bilong mi.

Crim J. Alpan,
Aitape/Wes Sepik



MARIT MERI WOK

Dia Edita - Nau mi laik bekim leta bilong Mista Tom Hino Hintere, Kainantu. Long las leta bilong en long namba 22 de, long mun Epril, long Sarere. Em i bin komplem long ol maritmeri ol i holim wok.

He pren, yu no ken ting se ol dispela maritmeri ol i wok nating. Sampela long ol ol i wok aninit long Pab-

lik Sevis Komisin na i gat strongpela lo long rausim nating ol, sapos ol i kam pemenen opisa long gavman.

Na tu sampela long ol dispela maritmeri ol i wok long Praivet bisnis. Na em tu i gat lo long lukautim ol. Em dipatmen bilong Leba i save lukautim.

Mi laik tokim-yu se dispela wari bilong yu wantaim ol dispela meri i raun nating. Sapos yu wari tumas long ol traim na kisim wanpela long ol bai yu givim wok long en. Bai yu amamas sapos yu lukim sapos i holim wok.

Wanpela poin tu olsem ol famili i painim sindaun long ol bikpela taun i kos moa long ol. Ol i no inap kipim ol famili i amamas long wanem ol samting olsem klos na kaikai i dia moa.

Na mi kolim ol samting long bikpela taun i no min ol dispela maritmeri ol i kam nating long ol bikpela taun. Ol man bilong ol i holim wok long gavman na tu ol meri tu wantaim.

Sapos yu no save lukim, pren mi askim yu long maski long pasim ai bilong yu na toktok nating. Nogut mi ken kolim yu long "wara nating". Olsem yu stap klostu long Wara Ramu na i mekim maus bilong yu i wel tumas. laka?

Skipa Denmark.
Lae.

MAN LAIK PASIM KLOS MERI

Dia Edita - Nau mi laik sapatim toktok bilong tupela brata ya E. Gim na Rafael Kerom. tupela brata mi bin lukim pas bilong yutupela na mi amamas tru long pas bilong yutupela tru brata. Toktok bilong yutupela i go olsem long ol meri i save putim klos bilong ol man.

Sapos yupela ol meri i laik putim samting bilong ol man, orait, mipela ol man putim sket na klos bilong yupela ol meri. Sapos mipela ol man i putim samting bilong yupela ol meri, bai i no luk nais long mipela tru.

Fred Basi.
Malala/Madang.



NIUS BILONG OL MERI



50 LIDA MERI SKUL

Moa olsem 50 meri bilong olgeta provins bilong Papua Niugini i bin kibung inap 3 wik long lainim olgeta pasin bilong mekim moa isi laip na wok bilong olgeta meri long ples.

Long Popondetta Agrikalsa Trening Institut ol i bin lainim pasin bilong wokim sop na kandel bilong ol yet, pasin bilong wokim wanpela oven long wanpela emti dram, na pasin bilong yusim olupela gumi bilong taia.


Ol i bin lainim tu olkain pasin bilong yusim ol samting i stap pinis long PNG bai ol i no mas go baim long ol ausait kantri. Raba o gumi em i gutpela eksampel. Yu inap wok im ol su gumi o slipa long raba bilong PNG stret. I gat faktori bilong wokim long Port Moresby.

Na sampela meri bilong Fiji na Solomons na Amerika tu i sindaun wantaim ol na i tok long kain kain famili plening.

Long namba wan wik ol i bin skul long pasin bilong groim kaikai moa hariap na mobeta. Na ol i skul long pasin bilong givim gutpela kaikai long ol pikinini. Wanem kaikai i gutpela na wanem kaikai i nogut.

Long namba namba tu wik ol i bin skul long pasin bilong kirapim sampela smolpela bisnis long ples, olsem bilong kukim bret na salim long ol wanples.

Long namba tri wik ol i bin skul long pasin bilong yusim olkain masin na tul long ples. Olsem pasin bilong yusim ol bafalo o bikbel bilong brukim graun, na maski long trakta. Ol i lainim kain kain pasin bilong smokim pis o mekim drai ol banana. Ol i lainim sampela wok tu ol man tasol i save mekim, olsem long miksim simen.



SUVA MITING BILONG OL NES

Long Fiji bikpela asosiesen bilong Helt bilong Yunaitet Nesens (sotpela nem bilong em WHO) i putim narapela kibung bilong skulim 30 tisa i save trenim ol nes. Dispela kos em i bilong skulim ol opisa bilong WHO long pasin ol i mas yusim bilong wok gut wantaim gavman bilong ol kantri long Pasifik, na long wok bilong skulim ol nes nating na ol spesel nes bilong lukautim meri i karim pikinini.

Meri antap i soim ol arapela meri long kos long pasin bilong wokim kandel. Em i kapsaitim gris bilong kandel i wara pinis i go daun long kain liklik bek i gat wik bilong kandel insait.




LONGPELA GRINPELA BIN

Yu mas bungim:

- (1) wanpela mekpas grinpela bin
- (2) sampela anien
- (3) liklik wel o gris
- (4) wanpela tin mit
- (5) liklik hap kawawar
- (6) sol na pepa

Yu kukim olsem:

Klinim na katim ol bin liklik liklik. Katim anien na kawawar. Putim ol dispela samting insait long sospen wantaim liklik gris. Nau yu praim. Bihain ol i tan, orait, nau yu kapsaitim mit i go insait na miksim olgeta samting wantaim na kukim moa liklik. Dispela em i gutpela long kaikai wantaim rais o sayor o kumu. Sapos yu no gat tin mit; tin pis tu i orait.





REDI LONG FOREN AFEAS

Poto antap i soim lain manmeri i tren nau long Edminsitresen Koles long Port Moresby long kamap opisa bilong makim Papua Niugini long ol ausait kantri.

Kirap long lephan, long lain i sanap, yumi lukim: Michael Maue, Stephen Bale, Frank Iki, Clement Kote, Ben Sabumei (em bikpela man long Foren Afeas Opis), Freddie Lee em i skulim ol), Marianne Haoda, Minista Ebia Olewale, Ann Laurent. Long lain i sindaun yumi lukim: Joe Hafman, James Rubulas, Simon Sei, Kapa Yarka, Gessy Ahizo.

Moa olsem 200 manmeri i bin aplai long kisim dispela kain wok insait long Dipatmen Bilong Foren Afeas, tasol dispela lain i bin kisim namba wan mak bilong ol na i winim kos.

Ol i tren nau long ol kain kain save, inap long helpim ol long wok wantaim ol pipel bilong planti arapela na arakain kantri.

SAVE LONG KONSTITUSEN

Konstitusen em i as lo bilong kantri. Olgeta samting i hangamap long en. Tasol husat i bin ritim em? Husat i bin lukim em? Na inap nau i no gat wanpela man i bin tanim long tok Pisin o tok Motu.

“Wantok” niuspepa i ting em i gutpela samting, yumi kisim olgeta wik wanpela liklik hap bilong Konstitusen na tanim long tok Pisin bai yu yet i ken save long bikpela lo tru bilong kantri bilong yumi.

Konstitusen i stat long dispela tok: “Mipela ol pipel bilong Papua Niugini, mipela i raitim daun hia bikpela lo bilong kantri bilong mipela, em independen kantri bilong Papua Niugini. Mipela i laik stat wantaim tripe-la bikpela tingting:

”

“Namba wan, mipela i tingting long God i strong ol geta. Maski em i gat planti kain nem, tasol em i Bikpela bilong mipela.

”

“Namba tu, mipela i tingting amamas long ol tum-buna bilong mipela bilong bipo.



”

“Namba tri, mipela i laik mekim gut long ol tum-buna pikinini bai kamap bihain long mipela.”

”


Aveling Barford Pacific Pty. Ltd. For your civil engineering, agricultural and domestic machinery.

Graders
Weight range 11,000- 19,000 kg
All Wheel Drive and Steer
Conventional
Leaning Wheel
Hydraulic Controls
Powered by Leyland or
G.M.
Powershift or Standard
Transmission




Front End Loaders
Bucket Sizes of 1.3 cu.
metres to 3.82 cu. metres
Pivot or rigid frame available
Logging Attachments

Rollers
Vibratory Rollers
Self-propelled or Towed
Hydrostatic Drive
Pivot Steer
Asphalt Conversion
Padfoot Roll



Head Office: Ume St., Gordon, Port Moresby,
P.O. Box 6457. Phone 25 7166. Telex 22206.
Lae Depot: Morobe Ave, P.O. Box 1191, Lae.
Phone 42 4188. Telex 42411.



Poto antap i soim wanpela Nissan trak i save karim inap 2½ tan em gavman bilong Nu Silan i bin presen long Port Moresby Komyuniti Dvelopmen Grup. Kos bilong dispela trak inap long K5,700.

Mista Mike Mansfield, man i makim Nu Silan long PNG, i bin presen long dispela trak long nem bilong kantri bilong em. Em i tok em i amamas tru long helpim dispela developmen grup, long wanem ol i taitim bun na mekim gutpela wok tru namel long ol skwata pipel insait na nabaut long Port Moresby. Nau ol i gat nupela aidia long helpim ol dispela skwata pipel i go ausait long taun liklik na kisim ol liklik hap graun we ol i ken sindaun na groim kaikai bilong ol na salim long maket. Na inap mekim dispela wok, ol i mas gat wanpela trak. Olsem na Nu Silan gavman i bin givim long helpim ol.

Mista Brian Amini, Dairekta bilong Opis bilong Informsen na siaman bilong grup, i tok tenkyu long Nu Silan Gavman. Em tu i amamas long grup na i tok, long planti taun i gat ol skwata i stap. Sori, Tasol i no gat planti pipel i laik go insait na traim helpim ol.

Long 7 Jun 1978 bai gat nupela lain stem i kamap na i soim kain kain bilas bilong het ol i save yusim long Papua Niugini Nambis.

Stem bilong 35t i soim wanpela man bilong Garaina (Morobe Provins). Dispela bilas i luk olsem wanpela bikpela wil, na ol gras bilong em i kam long wing bilong taragau. Antap tru em 5-pela kangal bilong kumul. Sapos yu lukim dispela bilas, i luk olsem 5-pela paia i lait i sanap antap long en.



Stem bilong 10t i soim wanpela man bilong Koiari (Sentral Provins). Olgeta bikpela kangal bilong bilas bilong het, i kam long gras bilong waitpela koki, na ol ret-pela gras i bilong koki meri. Long poret em i gat sampela girigiri, na tupela lain tit dok. Klostu long yau em i gat gras bilong kapul. Long maus em i holim wanpela stik, tupela poin bilong en i bilas long gras bilong kakatu.



Stem bilong 20t. i soim wanpela yangpela meri bilong Orokaiva (Noten Provins). Meri ya i pulim gras bilong het i go bek na insait long gras em i sanapim olkain gras bilong pisin. Bihain tru em gras bilong muruk, na antap long en kangal bilong kumul, na antap long en gen em ol gras bilong koki. Long poret em i gat hap gras bilong kapul i gat mak mak.



Stem bilong 50t i soim man bilong Trobriand Ailan (Milne Bay). Ol kangal bilong dispela bilas i bilong wanpela pisin ol i kolim Katakera. Na ol bilas nabaut long maus em ol i wokim long sit bilong paia, na insait ol waitpela mak i bilong kambang tasol.



TULTUL TITAN

Titan (NG) Pty Ltd. P.O. Box 25 Lae Ph 423988. 423497

I no ken ting olsem bulmakau ya i gat so na ol dokta i pasim banis long em. Nogat. Em i winim pes prais long Sydney Roiol Ista So. Na em bilas bilong em. Em i bin winim.

Ol i bin lukautim bulmakau ya long wankain banis olsem TITAN banis bilong mipela.

VSW AAS
EASTER SHOW

YAKANDUO PINISTAIM

Mista Lorens Yakanduo, man i bin wok insait long Wewak-But Lokal Gavman Kaunsil inap long 11-pela yia, em i laik pinistaim nau. Em i laik go sindaun malolo liklik long ples, na redi long go insait long ileksen bilong Provinsal Gavman long Is Sepik long mun Novemba.




Stat long 1967 em i holim wok kaunsila long Is Sepik. Na insait long dispela kaunsil na tu insait long interim provinsal gavman bilong Sepik em i oltaim holim potolio bilong bosim edukesen. Em tu i memba bilong Provinsal Edukesen Bot, stat long yia 1970.

As bilong dispela samting, em i long Mista Yakanduo bipo em i katekis na tisa inap long planti yia. Em i kam long hap bilong Boikin.

Em i namba tu primia bilong Is Sepik Provinsal Gavman.

VIETNAM PRIS LONG PNG



Poto i soim wanpela pris bilong kantri Vietnam long Esia i wok nau insait long het opis bilong Katolik Sios long Papua Niugini. Nem bilong em Monsinio Philippe Le-xuan-Thuong.

Taim kantri bilong em i stap long bikpela woa, em i go pinisim semineri o skul pris bilong em long Rom na em i kamap pris long Manila long Filipin Ailan long yia 1970. Bihain em i go insait long wok bilong makim Katolik Sios long kain kain kantri na em i stap inap 3-pela yia long kantri Bangladesh long Esia.

TRU O NOGAT?

Long bikpela kibung long Tasmania long bigin bilong dispela yia ol deliget i bin autim dispela bilong ol bilong planti bikpela lida long ol kantri bilong Esia na Pasifik. "Planti pipel long ol dispela kantri i bel nogut long lukim pasin bilong sindaun bilong ol bikpela lida bilong ol. Ol i mekim switpela tok long yumi no ken skrap long olkain naispela samting i kostim bikpela mani - tasol ol lida yet i bungim planti kain dispela bilas nabaut long ol. Ol lida i mekim planti bikpela longpela toktok long helpim ol man long ples na ol fama - tasol lida i kirapim olkain samting i save helpim tru ol taun. Ol lida i tok yumi olgeta i wankain na yumi mas lukaut bai kantri i tilim nabaut ol gutsamting long olgeta pipel wantaim. . . tasol ol dispela lida yet ol i sindaun olsem maniman tru."

OL NAMBA BILONG EDUKESEN

Sapos wanpela man i askim yu: i gat hamas skul long provins bilong yu, bai yu save? Na i gat hamas sumatin long distrik bilong yu? Na i gat hamas skul olgeta long PNG? Na i gat hamas sumatin olgeta?

Mipela i ting yu laik save long ol dispela samting, olsem na mipela i bin painim ol dispela namba long "Education Gazette" bilong Dipatmen bilong Edukesen bilong Mas, 1978 na mipela i givim hia.

Pastaim mipela i givim ol bikpela namba.
Namba bilong ol praimer skul = 1,925
Namba bilong ol haikul = 85
Namba bilong ol vokesenel skul = 98
Namba bilong ol tisa koles = 7

Em hia nau namba bilong ol sumatin insait long ol dispela skul:
Praimeri = 253,608
Haikul = 32,520
Vokesenel = 4,704
Tisa Koles = 2,437

Nau yumi lukim wan wan provins long 1977

Provins	Praimeri	Haikul	Vokesenel	Tisa Koles
Westen Galp	68 (7,889)		5 (173)	
Moresby	54 (6,570)	2 (663)	3 (101)	
Sentral	25 (9,719)	5 (1,909)	6 (464)	1 (383)
Milne Bay	108 (12,834)	6 (2,546)	6 (194)	
Noten	148 (13,834)	4 (1,706)	6 (275)	
Saten Hailans	69 (1,002)	2 (1,002)	(208)	
Isten Hailans	111 (15,845)	4 (1,314)	(216)	1 (251)
Simbu	161 (18,505)	5 (1,678)	3 (145)	
Westen Hailans	84 (13,126)	5 (1,729)	3 (177)	
Enga	95 (18,453)	5 (1,627)	5 (216)	1 (291)
Morobe	59 (10,167)	3 (936)	(18)	
Madang	169 (24,169)	6 (2,435)	7 (572)	(367)
Wes Sepik	106 (15,822)	4 (2,260)	6 (230)	(302)
Is Sepik	89 (9,987)	3 (973)	8 (321)	
Manus	128 (20,418)	5 (2,000)	8	(279)
Nu Ailan	47 (2,827)	2 (740)	(93)	
Is Nu Briten	98 (7,404)	5 (1,546)	3 (129)	
Wes Nu Briten	112 (16,274)	9 (3,742)	6 (424)	(564)
Not Solomons	72 (10,398)	3 (901)	3 (901)	
	121 (11,773)	5 (1,876)	8 (306)	

LAIKIM SPESEL KAIN SEKETERI.

Eksekyutiv Komiti bilong Melanesian Kaunsil bilong ol Sios i laik tok save olsem: ol i gat spes long wanpela DEVELOPMEN SEKETERI na sapos yu ting yu inap mekim dispela wok, orait, yu aplai long ol.

EM HIA SAMPELA TOK SAVE LONG DISPELA WOK:

- 1.) Ol bai traim wok bilong dispela seketeri inap 2 yia.
- 2.) Manmeri i laik aplai i mas memba bilong wanpela sios i stap insait long Melanesian Kaunsil bilong ol Sios. Em i mas save moa long olkain wok insait long kain kain komyuniti, na em i mas laik helpim komyuniti developmen i go het.
- 3.) Dispela seketeri i olsem bris namel long het opis bilong Melanesian Kaunsil bilong ol Sios na ol wan wan sios insait long en.
- 4.) Em bai wok long helpim ol memba Sios na komyuniti grup long painimautim olkain nius na ripot na wari bilong ol pipel i stap long ol taun.
- 5.) Opis bilong dispela seketeri bai stap long Port Moresby. Tasol sampela taim em i mas raun na lukim ol arapela senta tu.
- 6.) Dispela seketeri bai redim olkain kibung, na trening kos, na woksap.
- 7.) Sapos yu laik aplai, pas bilong yu i mas kamap bipo long de namba 31 bilong Me 1978.

Rev. Dick Avi
Esekyutiv Opisa, M.C.C.
P.O. Box 1015
BOROKO

PRIS NO GAT FUT NA WOKABAUT

Pater Lucien Vevhupa, wanpela Engliken pris bilong Noten Provins, nau tasol i kam bek pinis long Brisbane, na em i wokabaut long tupela fut giaman. Em i yusim tupela stik yet. Tasol bihain long 3-pela mun bai em i wokabaut nating long nupela fut diwai.

Long yia 1976 em i lusim tupela fut bilong em long wanpela birua. Em i stap long Popondetta wantaim meri bilong em na i laik go long haus sik bilong misin. Em i sindaun i go wantaim PMV. Wanpela bikpela trak i bamim PMV na tupela lek bilong Pater i bruk olgeta. Ol dokta i no inap pasim bek na ol i mas rausim tupela i go olgeta.

Ol i bringim Pater i go hariap long Port Moresby haus sik. Tasol ol tu i no inap. Bihain em i go long Australia na ol i wokim tupela fut giaman na bihain long sampela mun em i lainim gut tru long wokabaut long tupela. Nau man i no ken save hariap, Pater Lucien i no gat fut tru bilong em yet.

Bihain Pater Lucien i painim bagarap, ol wanlain na wanfamili bilong em i laik mekim save bekim long lain bilong draiva bilong bikpela trak. Ol i holim spia, banara, tamiok, na ol samting bilong pait. Tasol Pater i harim dispela tok, na em i no laik tru. Em i tok ol i Kristen pinis. Ol i tambu long bekim. Olsem na em i stap yet long haus sik long Moresby na em i ring long telipon i toktok wantaim ol bikpela man na i krosim ol. Olsem na ol i brukim spia na i no pait.

Planti pipel long ples i ting Pater i dai pinis long wanem longtaim ol i no lukim em moa. Ol i no laik bilip em i stap long Brisbane. Nau em i laik go bek long ples. Na taim em i kamap, bai planti pipel i kalap nogut na i ting em i bin kirap gen long indai. Tasol em i laik tokim ol tasol, ol i mas bilip, na pre na God bai stretim sik bilong ol tu.

Pater Lucien i gat 34 krismas, i marit na i gat 5-pela pikinini. Wanpela i stap long Sogeri Sinia Haikul.



NIUSPEPA



KOMITI

Minista Bilong Ol Midia, Mista Tom Koraea, i bin makim wanpela komiti bilong bungim olkain tok save na skelim gut na painimaut, sapos kantri inap long statim wanpela moa niuspepa i save kamaut olgeta de. Em i bin makim ol dispela wok long en:

1. Komiti i save dispela samting pinis bipo em i stat: i no gat wanpela kampani o grup o lain pipel long dispela kantri tude inap long statim na ranim wanpela nupela nesanel niuspepa i mas kamaut olgeta de. Gavman tasol inap. Olsem komiti i mas traim painimaut dispela samting: sapos gavman i laik statim kain niuspepa olsem em i mas putim hamas mani insait long en?
2. Dispela komiti i mas bungim olkain save na painimautim ol dispela samting, na bekim tok long ol dispela kain askim:
 - (a) Olsem wanem na gavman i ken helpim statim wanpela niuspepa olsem na putim mani insait - tasol i no pasim tingting na fridom bilong ol man i ranim niuspepa? Bai ol i fri long prinim ol samting ol i ting i gutpela nius, maski sapos em i egens long gavman o sampela man bilong gavman?
 - (b) Ol i mas mekim wanem samting bilong bringim dispela niuspepa i kamap long olgeta ples we ol manmeri i save rit?
 - (c) Bai ol i raitim dispela niuspepa long wanem tok ples? Long tok Inglis, o tok Pisin, o tok Motu - o tripela wantaim? Na sapos ol i yusim tok Inglis tasol, em bai wanem kain tok Inglis?
 - (d) Bai ol i prinim we?
 - (e) Bai husat i wok long dispela niuspepa?
 - (f) Bai em i kisim edvetais tu? Wanem kain?
 - (g) Bai hetopis i stap long Moresby o long Lae o Rabaul o long wanem ples?

Dispela Komiti i ken painimaut olgeta arapela samting tu sapos em i ting i gutpela long helpim save bilong man i laik statim wanpela niuspepa.

Sapos sampela pipel nating o sampela grup o lain i laik salim sampela tingting, o i gat sampela gutpela aidia long givim long dispela komiti, ol i welkam long salim i kam.

Ol dispela aidia ol pipel i salim i kam, mipela i no ken autim nating long ol arapela man. Olsem ol i no ken pret. Manmeri i raitim o i salim kain aidia o tingting i kam, em i mas sainim nem na givim adres bilong em. Long wanem, sapos komiti i laik askim em moa long aidia bilong em, ol i gat adres bilong em pinis.

Ol i mas salim ol aidia i tingting i go long:


The Chairman, National Newspaper Committee
P.O. Box 2312, Konedobu

Ol pas i mas kamap bipo long de namba 16 bilong Jun 1978.

Mi yet mi raitim dispela tok save.

B.K. Amini - Siaman bilong Nesanel Niuspepa Komiti

Laikim wanpela niuspepa moa



Mista Tom Koraea, Minista bilong ol Midia (em wok nius na redio) i bin autim tingting bilong em long Palamen long mun Mas yet, em - na sampela arapela minista tu - i laikim narapela niuspepa i mas kamap long Papua Niugini na kamaut olgeta de.

Mista Koraea i bin go lukluk raun long sampela kantri long Esia na i kam bek na tingting bilong em i strong moa long dispela nupela niuspepa. Olsem na em i bin makim wanpela komiti bilong redim rot bilong statim kain niuspepa olsem.

Mista Tom Koraea

Hetman bilong komiti em i Mista Brian Amini (Dairekta bilong Opis bilong Infomesen), Mista Luke Sela (Edita bilong "Post Courier" niuspepa), Pater Kevin Walcot, S.V.D. (Hetman bilong bosim "Wantok" niuspepa), na Mista Tony Reed (Namba wan pablikesen opisa bilong Opis bilong Infomesen).

Dispela spesel komiti bai traim painimaut ol dispela samting:

1.) Namba wan samting, olgeta saveman i save pinis long en, em hia: i no gat wanpela kampani o grup insait long

dispela kantri i gat mani inap long ranim wanpela niuspepa i mas kamaut olgeta de long wik. Gavman tasol i gat inap mani long mekim kain samting olsem. Komiti i mas painimaut, gavman i mas putim hamas mani insait long statim dispela kain samting.

2.) Komiti i mas paitim tok na painimaut ol dispela samting moa:

(a) Olsem wanem na gavman inap long ranim wanpela niuspepa, na i no ken bosim olgeta kain nius i go insait? Wari i olsem: inap long

edita o niuspepa i ken tok egens long gavman o wok bilong em o pasin bilong em, sapos gavman o wok bilong em, sapos gavman yet i baim ol wokman bilong niuspepa?

(b) Bai dispela niuspepa i ken kamap long ol pipel long ples olsem wanem tru?

(c) Bai ol i raitim niuspepa long wanem tok ples? Long tok Inglis tasol, o long tupela o tripela tok wantaim? O long tok Pisin, o tok Motu? Na sapos

em i yusim tok Inglis, bai em i wanem kain tok Inglis? Kain olgeta manmeri i winim standet 6 i ken ritim, o olsem wanem?

(d) Husat bai printim?

(e) Wanem ol wokman bai ranim?

Mista Brian Amini

(f) Bai em i kisim olgeta kain edvetais o i tambu long sampela kain?

(g) Bai hetopis bilong dispela pepa i stap Port Moresby o Lae o Rabaul o long wanem hap????

Sen John Ambulans grup i laik wok wantaim tripela kampani long woksap bilong ol na skulim sampela wokman long pasin bilong mekim fes et.

Ol i laik traim tu long painimaut hamas aua i lus bikos ol wokman i mas go long dokta o haus sik o klinik bilong kisim marasin. Na ol i gat wanem sik?

Tripela woksap i bilong Post Courier, Atlas Plant Hire, na Moresby Battery Service.



THE INVESTMENT CORPORATION OF PAPUA NEW GUINEA



Long poto antap yumi ken lukim sampela man bilong Tari long Saten Hailans i sanap holim winmani ol i bin kisim long Invesmen Koporesen ofis klostu long ol.

BAIM SEA LONG INVESMEN KOPORESEN
BILONG PAPUA NIUGINI

*na bai yu kisim winmani bilong wanpela
bikpela bikpela kampani tru*

Sapos yu laik save moa long we bilong kisim winmani, yu rait long: Investment Corporation
P.O. Box 155
Port Moresby

NEM BILONG YU:

ADRES BILONG YU:

.....



Lesen Namba 2:

LO BILONG HELPIM TARANGU



1. Sanap pastaim na tingting. Sanap na lukluk gut. Skelim gut: hamas manmeri i bagarap? Ol i bagarap olsem wanem?
2. Lukaut bai narapela samting i no bagarapim tarangu moa yet. Olsem, sapos em i slip long rot, pulim em i go arere. Nogut narapela ka i bamim em. Sapos haus i paia, pulim em i kam arasait.
3. Painimaut tarangu i pulim win o nogat. Sapos nogat, orait, yu winim maus bilong em. (Lukim lesen 10)
4. Sapos blut i ran, pasim. (Lukim lesen 3)
5. Strongim bel bilong tarangu - givim gutpela tok long em olsem: "Yu no pret. Mi lukautim yu. Bai yu orait. Mi salim tok long dokta/sista/nes/ambulans i kam. Bai ol i lukautim yu gut."
6. Singautim sampela man i helpim yu. (Salim tok long ambulans o PMV o doktaboi o nes i kam.)
7. Mekim bai ol manmeri i sanap nating na i lukluk, i surik i go bek. Nogut ol i pasim ples na bungim sikman. Em i mas kisim win gut.



Strong Tru.

HUSKY DYNA

**Niupela trak bilong Toyota i save wok hat tru.
Yu laik karim kago o pasindia – long biktaun
o rot nogut long bus – dispela trak em inap.**

TOYOTA

BRANCHES AT: PORT MORESBY 25 4088 LAE 42 2322 MT. HAGEN 52 1888

ELA MOTORS LIMITED

MADANG 82 2188

RABAU 92 1988

KIETA 95 6083

WEWAK 86 2255

GSP ET 013P

LIQUOR (LICENSING) ACT AMENDED 1973

Liquor (Licensing) Act bilong 1973 i tok, bai i gat sampela spesel kibung bilong Komisin bilong bosim ol strongpela dring long olgeta provins na ples i stap long tok save daunbilo, bilong stretim tok long ol eplikesen mipela i printim daunbilo. Bai ol i makim de bilong ol dispela kibung.

HUSAT I APLAI

WANEM KAIN EPLIKESEN

WANEM KAIN LAISENS

PLES

CHIMBU PROVINCE

1. Koro Tavern Pty. Ltd. 2. Peter Takai	Nupela Eplikesen Rausim	Haus dring Stuakipa	Gomugl Village, Kerowagi. Ku Village to Ombondo Village.
--	----------------------------	------------------------	---

EAST NEW BRITAIN PROVINCE

1. Roy Atherton Keil (Return Service Club) Transferor Piris Beutler Restaurant and Catering Service Pty. Ltd. (Transferee)	Senisim Nupela Eplikesen	Haus Kaikai Klap	Section 27, Lot 5, Rabaul. MalMal Village, Pomio.
2. Malmal Club			
3. Seabreeze Enterprises Pty. Ltd. (Transferor) G.B. Antal & E. Ann Antal (Transferee)	Senisim	Haus Kaikai	Portion 640, M/L Blanche, F/M Rabul.
4. John Wartoto (Transferor) July Magiao (Transferee)	Senisim Nupela Eplikesen	Stuakipa Stuakipa	Talugum, Nanga Nanga Village, G. Pen. Kabatirai Village, Duke of Yoke Island.
5. Melchior Turkanap			
6. Noel John Butler (Angco. Pty. Ltd.)	Nupela Eplikesen	Dila	Malaguna Road, Rabaul.

EAST SEPIK PROVINCE

1. Torembi Business Group	Nupela Eplikesen	Stuakipa	Torembi No.2 Village, Wewak.
---------------------------	------------------	----------	------------------------------

MADANG PROVINCE

1. Kalala Brothers	Nupela Eplikesen	Stuakipa	Uragan Village, KarKar Island.
--------------------	------------------	----------	--------------------------------

MOROBE PROVINCE

1. Walesy Trade Store 2. Robert Sinclair	Nupela Eplikesen Nupela Eplikesen	Stuakipa Hotel	Labutina Village, SIO 2. 4th Street, Lae.
---	--------------------------------------	-------------------	--

SOUTHERN HIGHLANDS PROVINCE

1. Boli Nawi 2. Wiru Business Group	Nupela Eplikesen Nupela Eplikesen	Stuakipa Stuakipa	Yubi Village, Mendi. Section 1, Lot 15, Pangia.
--	--------------------------------------	----------------------	--

WESTERN HIGHLANDS PROVINCE

1. Ati Mapa Business Group 2. George Koim (Mek Trading)	Nupela Eplikesen Nupela Eplikesen	Stuakipa Stuakipa	Ngent Village, Mount Hagen. Anglimp Village, Kuli Area.
--	--------------------------------------	----------------------	--

Port Moresby - 1 Me 1978, One Thousand Nine Hundred and Seventy Eight.




M.K. YERE,
A/CHIEF COMMISSIONER.

MAS SENISIM OPISA

Mista Ebia Olewale, Minista Bilong Ol Wok Wantaim Ol Ausait Kantri (em ol i kolim Foren Afeas) i bin askim man bilong makim Indonesia long PNG, em Mesa Jeneral Busiri Surjowinoto, long senisim infomesen opisa bilong em. Nem bilong dispela opisa em Mista Jusbeth Sireger.

Mista Olewale i tok, Mista Sireger i no bin mekim stret-pela pasin. Em i bin askim gavman bilong Papua Niugini long traim wantaim moa sapos ol Indonesia i bin kisim sitisensip long PNG, ol i sambai long PNG tru, o long husat? Dispela kain samting em i bilong Papua Niugini stret, Mista Olewale i tok, na Mista Sireger i mas sem long askim long kantri we em i stap pasindia tasol.

Na sampela arapela tok Mista Sereger i bin raitim tu, i bin mekim planti pipel bilong PNG i kros long Indonesia. Tasol Mista Olewale i tok - tupela kantri i no kros tru. Nau tasol Mista Olewale i go lukluk raun long Indonesia.

As bilong trabel em ol sampela "fridom paitman" bilong lain pipel i no laik Indonesia i bosim Irian Jaya, na ol i laik kirapim pait na kisim independens long Irian Jaya. Ol i gat sampela kem long graun bilong Papua Niugini. Na dispela samting, gavman bilong PNG i no laik. Em inap statim bikpela trabel namel long PNG na Indonesia.

Papua Niugini i bin orait long putim opis bilong em long kantri Isrel. Mipela i no bin makim wanpela tokman yet bilong makim mipela. Na Mista Michael Elizur bai makim Isrel long opis bilong em long Australia.

Kantri Kosta Rika (Costa Rica) long Sentral Amerika tu nai i laik wok wantaim PNG. Opis bilong ol long Japan bai makim ol long PNG tu.



MAKIM 7 KANTRI


Poto antap i soim 7-pela tokmanmeri i makim kantri bilong ol insait long Papua Niugini. Ol i bin go long Edministretiv Koles long givim kain kain skul long ol manmeri i tren long kamap tokman bilong makim PNG long ol ausait kantri. Ol bai wanwok bilong ol dispela lain spesel pipel.

Kirap long lephan yumi lukim: Mista Mike McWilliams (makim Australia nau long PNG), Mista R.G. Lilagan (makim Filipin Ailan), Mista Donald Middleton (Hai komisina bilong Englan), Mista Mike Mansfield (Hai komisina bilong Nu Silan), Mis Mary Olmstead (makim Amerika), Minista Ebia Olewale (Foren Afeas PNG), Mesa Jeneral Surjowinoto (makim Indonesia), Mista K. Yamaguchi (makim Japan).

BOROKO MOTORS



Tractors
Equipment



YU KEN LUKIM NUPELA FORD TRAKTA
LONG BOROKO MOTORS LONG OLGETA

HAP BILONG PAPUA NIUGINI na tu
long ARAWA MOTORS.



EM I WINIM OLGETA ARAPELA TRAKTA
INSAIT LONG PAPUA NIUGINI

***** PLANTI SPEA PAT

***** PLANTI MEKANIK


AIR NIUGINI
THE NATIONAL AIRLINE OF PAPUA NEW GUINEA



**MIPELA GAT SAMPELA
SPESEL BALUS BILONG
KARIM KAGO**

EM HIA KAGO BILONG WANPELA BALUS

**Sapos yu laik samting i kamap hariap
orait, yu putim long balus tasol**



VILES DIVELOPMMEN

WOK PIK MAS WIN

Long bigin bilong mun Me, Minista bilong Praimeri Indastri, Mista Julius Chan, i bin go lukluk raun long wok pik insait long dipatmen bilong em. Bikpela ples tru em i bin lukim, em long wanpela senta bilong olkain we na pasin bilong kamapim na groim ol gutpela na bikpela pik. Dispela senta i stap long Goroka. Na em i go tu long Tari long Saten Hailans long lukim wok pik tu.

Long Goroka, Mista Chan i bin autim sampela tingting bilong em long wok pik. Em i tok strong moa, em i laik bai insait long 18 mun Papua Niugini i no mas baim moa mit long ol ausait kantri. Em bai inap groim bilong em yet.

Mista Chan i tok, nau yumi save baim 800 tan mit bilong pik long ol ausait kantri long wan wan yia, na hia yumi save lusim K1,500,000 kina. (Em wan milion faiv handet tausen kina).

Ol i bin statim sampela smolpela banis pik nabaut long Lae taun. Na long pinis bilong dispela yia Mista Chan i ting ol pipel nabaut long Madang na Wewak bai inap long groim inap mit bilong pik bilong olgeta pipel long hap bilong ol.

Mista Chan i tok moa: Mi gat strongpela tingting long (i go moa long pes 18)

ENGA GRUP WOK GUT

Long mun Mas yet wanpela spesel grup pipel, em ol i kolim Ekstensen Bot bilong Enga, i kibung long Eria Atoriti Haus long Wabag, na ol i autim sampela gutpela aidia.

Insait long dispela bot i gat 21 memba na ol i spesel pipel i wok long helt na edukesen na didiman na gavman, komyuniti dive-lopmen, na kain kain kom-yuniti nabaut long Enga.

Wanpela grup bilong ol i bin mekim wanpela lukluk raun na givim ripot long kain kain kaikai ol i bin painim long 81 tret stua nabaut long Enga Provins. Nem bilong tripela: Fabian Yapo (dokta tit), Timothy Eso (studen), Andrew Yamenea (bilong Praimeri Indastri dipatmen).

Orait, ol i bin raun long 81 tret stua long olgeta distrik insait long Enga, insait na ausait long ol taun. Na ol i laik painimaut ol

stuakipa i save salim hamas rabis kaikai olsem: "sis pops", loliwara, na kain kain bisket. Na tu ol i salim hamas gutpela kaikai olsem pinat, na gutpela wara bilong muli, o kakao.

Ol i bin painim moa olsem 40 stua i save salim ol dispela "rabis" kaikai, na moa olsem 20 stua i save salim gutpela kaikai wantaim. Ol arapela stua i salim tasol tin pis na rais. Olsem ol dokta tit i kisim save pinis, watpo nau long Enga planti skulmanki i gat tit i sting na i bagarap. Em ol "rabis" kaikai tasol na olkain swit kaikai i save mekim. Bipo i no gat dispela wari olgeta.

Dispela grup i harim dis-

pela ripot na i vot long mekim olsem:

- (a) traime tokim gavman long putim takis antap long ol rabis kaikai na pasim rot bilong em.
- (b) givim spesel setifiket long olgeta stua i save salim tasol ol gutpela kaikai.

Planti pipel nating i no save, sampela kaikai i stap long tret stua i rabis kaikai tasol. Ol i ting, olgeta kaikai i gutpela tasol. Olsem na yumi mas skulim ol stret. Wanpela bikpela aidia em i long tokim ol pipel planti taim na long ples olsem: Yumi kaikai planti pinat. Ol i gutpela kaikai tru long yu na pikinini bilong yu.

Maxell i nem yu ken bilipim. Baim em tasol.



YU KEN BAIM LONG OL DISPELA HAGEMAYER STUA

P.O. Box 673, MADANG
PHONE: 822445

P.O. Box 1428, BOROKO
PHONE: 256144

P.O. Box 90, LAE
PHONE: 423200

P.O. Box 63, RABAUL
PHONE: 922633

P.O. Box 11, MT. HAGEN
PHONE: 52 1339



Pretty Hair
wantaim PB-P
i save
kilim ol laus kwiktaim tru.
Yu traim dispela paus.
Em i fri.
Na bai yu yet
yu ken save.

**Het bilong mi i no skrap moa...i no gat laus moa...
bikos mi yusim Pretty Hair.
(Em i min naispela gras.)**

(PASIN BILONG RAUSIM OLGETA LAUS)

Sapos skin bilong het bilong yu i skrap, em i min yu gat laus. Sop na ting wantaim wara i no inap long rausim ol laus. Nogat. Yu mas yusim PRETTY HAIR. Em bai kilim ol laus kwiktaim tru. Na sapos yu laik rausim olgeta laus tru long gras bilong yu, orait, yu mas bihainim dispela pasin hia:

LUKAUT

Ol laus ol inap kalap long gras bilong wanpela man/meri i go long narapela. Olsem yu mas lukaut bai olgeta pipel long famili bilong yu i yusim dispela PRETTY HAIR long wanpela wik. Na yu mas tambu long yusim kom o taul bilong arapela pipel. Sapos yu no laikim ol laus i kam bek long gras bilong yu, orait, yu mas yusim PRETTY HAIR wanpela taim long wik. Tasol sapos yu gat sua o buk long skin bilong het, yu no ken yusim.



1 Putim wara long gras. Nau kapsaitim sampela PRETTY HAIR paura long gras na rabim rabim inap spet i kamap.



2 Larim spet i stap olsem inap 10 minit. Bihain rausim dispela spet long klinpela wara.



3 Komin gras inap 5 minit samting, bilong rausim ol laus i dai pinis. 4 Mekim olsem olgeta tupela de, inap 3-pela taim. Long wan wan taim yu yusim

MANDE TUNDE TRINDE

FONDE FRAIDE

Orait **Nau Wantaim Long Wik**

wanpela liklik paus PRETTY HAIR paura. Bihain olgeta laus i go pinis, em inap sapos yu wasim gras bilong yu long PRETTY HAIR wanpela taim long wik.

Pretty Hair wantaim PB-P i kilim ol laus kwiktaim tru.

BISNIS LONG FEBRUERI

Kopa

Long mun Februeri PNG bin salim 38,850 tan kopa; em inap long K12,032,696 kina. Ol dispela kopa i go long:

Japan - 19,746 tan (K6,001,083)
Jemani - 14,402 tan (K4,498,346)
Korea - 4,701 tan (K1,523,367)

Skin Pukpuk:

Long mun Februeri PNG i bin salim skin pukpuk inap long K43,392 kina. Ol i go long:

Japan - K22,992
Frans - K20,400.

Ol Kaving

Long mun Februeri PNG i bin salim olkain kaving inap long K24,227 kina.

Australia i baim inap long K13,777.
Amerika inap long K8,478.
Holan inap long K1,500
Japan inap long K336
Kanada inap long K135

Wewak i win long salim ol kaving - bihain Madang, Lae, Port Moresby, Kimbe.

Kopi

Long mun Februeri PNG i salim 2,989,380 kilgram kopi, inap long K9,400,429 kina. Ol dispela i go long:

Jemani - 1,398,660 kilo (K4,478,569)
Australia - 730,800 kilo (K2,309,015)
Amerika - 299,760 kilo (K876,982)
Englan - 278,160 kilo (K883,044)
Nu Silan - 90,480 kilo (K283,658)
Kanada - 40,800 kilo (97,479)
Holan - 10,200 kilo (K34,654)
Japan - 120 kilo (K404)

.. ..


Mista Pato Kakarya, Minista bilong ol Yut na Hom Afeas, i tok save lone em i laik makim na salim 5-pela pipel i go long Yunivesiti bilong Saut Pasifik long Suva, Fiji, bilong wanpela kos, we ol i save trenim ol opisa bilong ranim olkain program bilong skulim ol yangpela pipel long kamap lida.

Mista Kakarya yet i bin raun long Fiji na Jamaica na i bin painim sampela gutpela we long kantri Jamaica bilong helpim ol yangpela pipel i winim mani long wok ol i mekim long ol graun i stap nating. Nau em i laik kirap traime mekim hia tu.

Praim Minista, Mista Michael Somare, i bin telimautim nem bilong ol 11-pela man bai holim wok bilong edministretiv seketeri long ol sampela provins. Dispela wok i bikpela tru long wan wan provins, na i aninit tasol long primia.

Nem bilong ol hia:
Mista Gabriel Buanam (Madang), Mista Henry Veretau (Is Sepik), Mista Levi Yogiyo (Isten Hailans), Mista Patrick Gaiyer (Westen Hailans), Mista Florian Mambu (Enga), Mista Roy Yaki (Saten Hailans), Mista Donald Sigimata (Galp), Mista Meli Lapaseng (Nu Ailan), Mista Nason Paulias (Is Nu Briten), Mista Bill Warren (Wes Nu Briten), Mista Cedric Tabua (Westen).

Laik baim Kapa? Askim ol long Zincalume Kapa tasol!




Zincalume em i wanpela kain kapa i no save ros o bagarup kwik.
Sapos yu laik wokim haus askim ol long dispela
kain kapa tasol.

 **John Lysaght (PNG) Pty Limited**

LAE: P.O. Box 872, Tel. 421866 PORT MORESBY: P.O. Box 5978, Boroko Tel 253119 RABAU: P.O. Box 62, Tel 921044

GSL02



British Information Services foto .

Mista Chan i laikim dispela kain pik long PNG i mas kamap planti moa.

WOK PIK MAS WIN

(i kam long pes 15)

mekim spesel wok long sampela spesel samting. . . olsem hia, long pasin bilong groim pik. Sapos yumi ken mekim tasol long ol bikpela fam, orait, bai mipela i mekim. Inap nau dispela pasin bilong larim wan wan fama i groim pik, i no bin kamap gut. Tasol sapos mipela i lukim dispela nupela pasin bilong smolpela banis pik klostu long ol biktaun i wok gut, orait, mipela i laik helpim ol man i ranim gut dispela bisnis.

Narapela aidia em i long yumi sanapim sampela spesel pik fam nabaut long wan wan provins. Hia bai ol save-man i kamapim ol gutpela pik mama na pik susu na ol lokal fama i ken baim na kamapim gutpela lain pik bilong ol yet.


Inap nau pik em i no kaikai tasol bilong ol pipel. Nogat. Long planti hap pik em i mani bilong ol pipel. Na ol i gat moka long Hailans, na i senisim pik, na i baim meri long pik, na i stretim kros long mit bilong pik.

Bipo ol didiman i bin traim bringim ol pik bilong wait-man i kam insait na i marit wantaim ol lokal pik. Tasol ol i no bin kamap strong; ol i no inap long Papua Niugini. Tasol nau mipela i mekim narakain.

PNG



Sapos yupela laik kirapim bisnis bilong prinim pepa kam lukim mipela long PNG Printing na bai mipela halivim yupela



TOK SAVE I GO LONG OL KENDIDET NA OL PIPEL I LAIK VOT

Olgeta kendidet na olgeta arapela pipel i mas save gut long ol dispela de:

1. BAIYER-MUL OPEN BAI ILEKSEN

- (i) Nominesen i stat - 10 Mas 1978
- (ii) Nominesen i pinis - 8 Epril 1978
- (iii) Stat bilong vot - 20 Me 1978
- (iv) Pinis bilong vot - 3 Jun 1978
- (v) Ol vot i kam bek - 10 Jun 1978

2. KOROKA-LAKE KOPIAGO OPEN BAI ILEKSEN

- (i) Nominesen i stat - 7 Epril 1978
- (ii) Nominesen i pinis - 6 Me 1978
- (iii) Stat bilong vot - 17 Jun 1978
- (iv) Pinis bilong vot - 8 Julai 1978
- (v) Ol vot i kam bek - 15 Julai 1978

3. MORESBY NORTH-EAST NA MORESBY NORTH-WEST ILEKTORRET BAI ILEKSEN

- (i) Nominesen i stat - 10 Epril 1978
- (ii) Nominesen i pinis - 19 Me 1978
- (iii) Vot long dispela
tupela de tasol - 24 na 26 Jun 1978
- (iv) Ol vot i kam bek - 3 Julai 1978

5. MENYAMYA OPEN BAI ILEKSEN

- (i) Nominesen i stat - 21 Epril, 1978
- (ii) Nominesen i pinis - 26 Me, 1978
- (iii) Stat bilong vot - 1 Julai, 1978
- (iv) Pinis bilong vot - 15 Julai, 1978
- (v) Ol vot i kam bek - 28 Julai, 1978

Sapos yu laik kendidet insait long wanpela dispela bai ileksen, yu mas givim nominesen bilong yu long opisa bilong bosim ileksen long ilektoret bilong yu. Yu mas mekim dispela bipo taim bilong nominesen i pinis.

Yu mas bringim wanpela poto wantaim nominesen tiket bilong yu na dispela poto em i mas 10 ins x 11 ins. Na yu mas baim nominesen long K100 long mani stret o sek bilong beng. Yu no ken baim long wanpela sek bilong yu stret.

Yu no ken wet, yu go hariap na putim nominesen bilong yu nau tasol.

J.S. Mileng
Komisina bilong bosim ileksen
P.O. Box 5348
Boroko
14 Epril 1978.

WOK SANGUMA KAMAP WE



Stori tumbuna

- Joe Arovong (Madang)

Bipo, bipo tru planti man tru i stap na no gat man i save long we bilong kilim man indai. Ol man save indai long taim bilong ol yet. Olsem ples i pulap long manmeri.

Tasol klostu long ples, wanpela rabisman i stap en i palai tasol. Palai i save stap long bikpela diwai, klostu long wara ol meri i save pulmapim wara long en. Na tu i gat wanpela ples hait bilong em yet antap long diwai.

Dispela diwai i gat rop, i go antap long en na dispela rop i bin mekim bikpela hip na i gat pikinini. Pikinini bilong rop i olsem raupela sospen, na long dispela palai i save slip olgeta taim.

Taim ol meri i laik pulmapim wara long dispela ples we palai i stap long en, palai i isi tasol i kamdaun na kilim ol wan wan. Taim ol dispela meri i go long ples ol i save indai. Long dispela ples ol i save

matmatim ol long graun.

Tasol ol man bilong ples ol i no klia long dispela indai bilong ol meri i kamap olsem wanem? Na tu ol i no save palai i stap klostu long wara na i save kilim ol meri. Nogat tru. Olgeta man i longlong long dispela samting i stap.

Wanpela taim, wanpela yangpela boi i skelim tingting bilong em, na i tok, "Olgeta taim mi save lukim ol meri save go pulmapim wara long dispela hap." Orait, long wanpela de. Wanpela meri i go daun long wara na dispela yangpela boi i hait tasol na bihainim dispela meri. Taim meri ya i laik pulmapim wara i stap. Wantu palai i ran i kamdaun long diwai na sangumaim dispela meri.

Yangpela boi i lukim palai pinis na wantu i ran i go long ples na tokim ol man i spik: "Mi lukim pinis wanpela samting i save kilim yumi em palai. Man, palai i no manki em i

bikpela na i gat tupela het na tang." Ol man bilong ples i harim tok pinis, orait i redim spia, banara, na ol kain kain samting bilong kilim indai dispela palai. Wanpela de ol i tokim wanpela lapun meri. Yu go daun long wara na bai mipela i bihainim yu. Dispela lapun meri i kisim ol mambu na pulimapim long bilum bilong em na i go daun bilong pulimapim wara.

Ol man bilong kilim indai palai ol i redi pinis. Taim palai i lukim meri i tan tasol i kam na holimpas em na i laik kilim lapun meri. Tasol ol man i banisim dispela man bilong sanguma na ol i sutim em wantaim spia. Taim ol i laik kilim dispela palai olgeta, em i tokim ol: "Ah! Yupela wet i no ken kilim mi kwik. Mi gat naispela na gutpela samting bilong tokim yupela".

Orait ol i wet nau palai i autim kain kain we bi-
(i go moa long pes 20)



**TOK SAVE I KAM LONG KOMISIN
BILONG BOSIM OL ILEKSEN BILONG
PORT MORESBY SITI KAUNSI**

**BAI OL I PENIM PINGA LONG
STRONGPELA BLAKPELA INK**

Komisina Bilong Bosim Ol Ileksn, em Mista James Mileng, i laik tok save long wanpela nupela samting. Long taim bilong vot insait long jeneral ileksen bilong Port Moresby Siti Kaunsil bai ol opisa i makim pinga bilong votman o votmeri long blakpela ink.

Taim wanpela man o meri i kamap i laik vot na em i kisim vot pepa, long dispela taim yet wanpela opisa bai makim liklik pinga bilong lephan bilong em long strongpela blakpela ink. Dispela ink inap long stap tupela de, na i mekim bai wanpela man o meri i no ken vot gen insait long dispela taim. Dispela ink i no save bagarapim skin liklik. Ol i bin traim pinis long India na Sri Lanka, na nau Komisina Bilong Bosim ol Ileksn i laik traim long dispela ileksen bilong Port Moresby Siti Kaunsil. Mista Mileng i tok, bihain bai ol i bihainim dispela pasin tu long olgeta ileksen bilong provinsal gavman, na tu insait long nesanel ileksen. Ol i wetim tasol bai ol i stretim ol lo bilong bosim nesanel na provinsal gavman ileksen.

Komisina Bilong Bosim Ol Ileksn, i tok bai ol opisa i bihainim dispela pasin long taim bilong vot long wanpela ileksen:

- (a) Ol i askim votman sapos em i bin putim nem bilong em long lista bilong vot.
- (b) Ol i traim painim nem bilong em long lista.
- (c) Votman i mas soim tiket ol i kolim "Form UC. 2" bilong soim em inap long vot.
- (d) Ol i lukim liklik pinga long lpehan bilong votman, bilong lukim i gat ink o nogat. Olsem: em i bin vot pinis o nogat.
- (e) Sapos i no gat ink long dispela liklik pinga long lephan, bai ol opisa i putim ink long en nau, na i givim vot pepa long votman.
- (f) Sapos votman i no laik, o i tambuim opisa long makim liklik pinga bilong em long blakpela ink, orait, em i no ken kisim vot pepa. Em bai tambu long vot.

Komisina Bilong Bosim Ol Ileksn i tok olsem: dispela pasin bilong yusim ink long pinga, na dispela pasin bilong votman i mas soim tiket, na nem bilong em i mas stap long lista bilong vot - ol dispela tripela samting wantaim bai helpim ol opisa bilong ileksen, na i pasim rot bilong man o meri i laik trik na vot tupela o tripela taim.

Mista Mileng i tok yumi mas strongim ol lo bilong vot insait long neks 12-pela mun, bai ol votman i no inap bagarapim ol ileksen long kain kain pasin nogut.

J.S. Mileng
Komisina Bilong Bosim Ol Ileksn
20 Epril 1978

YUNIVESITI

(i kam long pes 3)

Orait, nau Mista Lohia i singaut long ol plisman i kamap helpim em. Na nau ol studen i pait wantaim ol. Ol studen i stonim ol ka i ran long bikrot i go pas long yunivesiti, em ka bilong ol pipel i go long wok. Inap 1000 spesel plisman bilong stapim pait i kamap, ol i kam wantaim raifel na hat ain na bom bilong mekim man i krai. Sampela studen i tok ol plisman i paitim sampe-la bilong ol nogut tru.

Tasol planti studen i lusim yunivesiti na i no laik pait na ol i go sindaun wantaim ol wantok nabaut long Port Moresby. Ol plisman i kalabusim 106 studen na ol i kot long Boroko.

Tasol ol studen i sakim tok bilong Praim Minista na skruim straik i go. Ol studen long Yunivesiti long Lae tu i stapim skul long helpim ol Moresby studen.



STORI TUMBUNA

(i kam long pes 19)

long sanguma, posin, marila long ol bikman bilong ples. Em nupela samting tru na ol i amamas tru long kisim dispela samting o tok hait bilong palai. Bi hain long palai i autim olgeta stori bilong sanguma, ol i kilim em indai olgeta. Olsem as bilong ol sanguma, posin, na kain kain marila nogut, em palai yet i kamapim.

Olsem long olgeta hap bilong graun i gat ka'n kain samting nogut bilong bagarapim man. Na tu long PNG as tru bilong sanguma, posin, na ol arapela samting nogut bilong bagarapim pipel. Dispela samting tumbuna yet i bin kamapim na skruim i stap yet inap long dispela taim.



**OL DE BILONG VOT LONG BAIYER-
MUL OPEN ILEKTORET**

Sapos ol samting i ran gut, olgeta ples bilong vot long Baiyer-Mul Open Iektoret bai op long 8 klok moningtaim long de bilong vot na i pas gen long 6 klok long apinun, bihain long olgeta man i sanap i laik vot long dispela taim, i vot pinis.

Daunbilo long lpehan yu ken lukim de bilong vot, na long raithan em i ples bilong vot.

TAIM BILONG VOT,

PLES BILONG VOT

Sarere, 20 Me, 1978
Mande, 22 Me, 1978
Tunde, 23 Me, 1978
Trinde, 24 Me, 1978
Fonde, 25 Me, 1978
Fraide, 26 Me, 1978
Sarere, 27 Me, 1978
Mande, 29 Me, 1978
Tunde, 30 Me, 1978
Trinde, 31 Me, 1978
Fonde, 1 Jun, 1978
Fraide, 2 Jun, 1978
Sarere, 3 Jun, 1978
Sarere, 20 Me, 1978
Mande, 22 Me, 1978
Tunde, 23 Me, 1978
Trinde, 24 Me, 1978
Fonde, 25 Me, 1978
Fraide, 26 Me, 1978
Sarere, 27 Me, 1978
Mande, 29 Me, 1978
Tunde, 30 Me, 1978
Trinde, 31 Me, 1978
Fonde, 1 Jun, 1978
Fraide, 2 Jun, 1978
Sarere, 3 Jun, 1978
Sarere, 20 Me, 1978
Mande, 22 Me, 1978
Tunde, 23 Me, 1978
Trinde, 24 Me, 1978
Fonde, 25 Me, 1978
Fraide, 26 Me, 1978
Sarere, 27 Me, 1978
Mande, 29 Me, 1978
Tunde, 30 Me, 1978
Trinde, 31 Me, 1978
Fonde, 1 Jun, 1978

BALK
BALK
WARA
WARA
WUREP
WUREP
MABUGA
KUMDI
KUMDI
KOIBUGA
KOIBUGA
BUKAPENA
BUKAPENA
KUIPBAUT
KUIPBAUT
KUIPBAUT
LAKA
LAKA
LAKA
PAKALIS
PAKALIS
PAKALIS
MANKI RUTI
MANKI RUTI
MANKI RUTI
MANKI RUTI
GEGI
BANUMP
BANUMP
BANUMP
LAPARAMP
LAPARAMP
LAPARAMP
BAIYER STESIN
BAIYER STESIN
KULIMP
KULIMP

Mi raitim long dispela de namba 8 bilong Epril, 1978.

Gill KOLONGO

Opisa bilong bosim ileksen bilong Baiyer-Mul Open Iektoret bai ileksen.



YUMI SKRAPIM TOK PLES

Dia Edita - Nau mi laik autim liklik wari bilong mi. Wari bilong mi i go olsem. Mi lukim ol wokman bilong gavman i no stret long ai bilong mi. Bikos ol wantok i bin kisim wok gavman olsem kuskus o tisa na sampela wokman.

Wanpela bikpela samting ol save mekim olsem. Ol i no save givim toktok o hap smok o amamas wantaim. Man ya em i bin lukim em yet na amamas nogut tru long skin bilong em yet. Mi lukim ol wantok ples bilong mi samting i go wok long gavman. Na bihain mi tok ples wantaim em. Tasol man ya i no bekim tok ples long mi. Olsem na dispela taim mi kisim sem liklik. Na mi lukim man ya em i lukim em yet na amamas nogut tru. Em i lukim mi olsem sit bilong paia i karamapim mi na em i no laik toktok wantaim mi.

Plis ol wantok, mi lukim planti man bilong Saten Hailans pipel i save mekim olsem. Ol i save tingting long ol yet. Na ol dispela man ol i no save sindaun na wokabaut wantaim wantok. Plis ol brata. Mi pilim sem liklik long dispela rabis pasin bilong yu. Plis brata, mani em bilong yu tasol. Mi laikim yu ken givim mi long tok ples bilong yumitupela tasol. Sapos yu givim toktok, taim mi no inap i kam sindaun long haus bilong yu. Mi man pinis. Mi i gat tingting olsem na brata yu mas tingting gut long wantok bilong yu. Na amamas wantaim ol na givim sampela tok ples long em.

Yu no pikinini bilong

waitman na yu wok long pulim tok pisin na tok inglis wantaim ol viles pipel.

O yes wantok ya mi tokaut stret long pasin bilong en. Orait sapos yu belhat tumas raitim pas tasol long Wantok. Nogat. Orait yu mas senisim dispela rabis pasin bilong yu.

Gabriel Kupia,
Erave/S.H.P.

TOK PISIN KRANKI LONG WANTOK

Dia Edita - Mi gat wanpela wari, sapos yu laik prinim long niuspepa, yu ken prinim laik bilong yu; tasol yu mas bekim mi stret na tingting liklik long dispela wari bilong mi).

I luk olsem tu wik i go pinis na mi ritim wanpela WANTOK niuspepa, na bel bilong mi i kirap nogut long sampela tok pisin yu-pela yusim insait long dispela niuspepa.

Mi no klia gut nau long namba bilong dispela pepa, tasol dispela toktok i stap antap long namba wan pes yet.

Yupela raitim olsem: Bougainville Kopa i olsem nambawan MANI WINA insait long PNG i kam inap nau.

Dispela tok MANI WINA i no tok pisin - em i tok inglis tasol. Ating i no gat planti man long Is na Wes Sepik i save long dispela tok pisin. I luk olsem yupela ol bikman bilong nambawan taun tasol.

Insait tu long dispela pepa, yupela i stori long nupela wok ol i laik kirapim long Ok Tedi, na yupela putim ol piksa long soim mipela. Wanpela piksa i soim ples balus - i no bikpela, na yupela rait-

im aninit olsem: ol SMOLPELA balus i save pundaun long dispela ples balus.

Olsem wanem, mi no bin harim wanpela man o meri bilong hap bilong mi long Nuku Sab Provins i save toktok SMOLPELA. Smolhaus yes, tasol smolpela nogat. Yumi save toktok LIKLIK BALUS, o LIKLIK SAMTING.

Tru, tok pisin i save kisim ol nupela toktok i kam insait nau, tasol lukaut! Yupela bilong Wantok i mas was gut na prinim ol gutpela tok pisin. Yu no ken pulim nating ol kain kain tok inglis.

Mi amamas long baim WANTOK na ritim, na mi save givim long skul, tasol sampela taim mi belhat long yupela.

Mi wanpela waitskin, mi ausait man, tasol mi wari long dispela tok ples bilong yumi olgeta PNG - pisin.

Planti taim mi yet bagarapim tok pisin long wanem maus bilong mi i save hevi sampela taim. Tasol ol Madang, Tolai, Buka, Hailans, Samarai, ol i no save harim nek bilong mi. Ol Wassisi na Nuku tasol. Tasol yupela; sori planti man i lukim, na ol i bihainim. Em tasol. God bles.

Pater Peter Van Hees,
Nuku/Wes Sepik.

Dia Pater,

Yu yet yu tok ol Wassisi

i save harim tok pisin bilong yu. . . na ol Madang na Tolai na Buka na Hailans na Samarai nogat. . . Em nau. Em i as bilong wari bilong yu. Wantok em i mas pas long olgeta dispela ples. . . . Isi isi tok pisin i senis. . . na mipela i senis wantaim em. Tasol Wassisi i stap insait long bikbus na em i no save senis hariap. Na tok "smolpela" na "sotpela" i gutpela tok pisin. Lukim buk ol i kolim diksineri (dictionary). . . Tenkyu long pas bilong yu. Mipela i laikim. Mi edita.

MAS RAITIM NAMBA NARAKAIN

Dia Edita - Hia mi gat wanpela wari bilong mi i go olsem. Yes planti taim mi save lukim Wantok Niuspepa na mi save lukim wanpela samting long ai na tingting bilong mi i no gutpela.

Taim yupela save raitim ol namba bilong mani long mekim olkain wok insait long kantri. Na tu long baset bilong Gavman, em yupela i no save raitim long wods. Yupela save raitim tasol namba. Na planti ol bikman na meri long ples i no klia o save olsem dispela em tausen o milion.

Yes ol Wantok man na meri i save wok long Wantok Niuspepa inap bai yupela i ken wokim olsem o

nogat?

Ol wantok man wantok meri yupela save dispela Wantok Niuspepa i save i go long olgeta hap bilong PNG. Na i no long taun tasol. Ol man meri long ples tu ol i save kisim dispela Wantok Niuspepa.

Melchior Garogid,
Wewak.

PAITIM HAN KISIM PE

Dia Edita - Mi laik autim liklik wari bilong mi.

Em i olsem insait long Erave mipela i save pilai soka na basketbal na voli-bal. Dispela olkain pilai mipela ol katekis i save winim sampela taim. Nau sampela taim ol i save winim mipela.

Ol i save givim bikpela mani long mipela. Tasol ol i no save skelim dispela mani long mipela ol sampela katekis i lukluk na paitim han na givim amamas long ol man bilong pilai. Long wanem dispela bikpela mani i kam long nem bilong mipela olgeta katekis. Tasol ol i no save givim mipela. Ol yet ol i save skelim na baim samting long stua na mipela i lukluk i stap. Taim mipela i tok yumi skelim. Ol i save tok em hatwok bilong mipela yet ol i save tok olsem long mipela.

Pilip Pesue,
Erave/S.H.P.

BAIM WANTOK

Sapos yu laik kisim Wantok niuspepa inap long wan yia (em i olsem 48 taims) , yu katim dispela tiket long sisis na yu salim i kam long mipela wantaim K8.00.

Nem bilong yu.

Adres bilong yu.

Salim sek o mani oda inap long K8 wantaim tiket i kam long :

WANTOK BOX 1982 BOROKO

Sapos yu bilong wanpela skul o misin o klap o grup na yu laik kisim moa olsem 10-pela Wantok olgeta wik, orait, yu rait i kam long mipela na mipela i gat spesel prais long dispela kain samting.

Prais bilong go long Australia: K14.50 na long Amerika na Yurop long sip em i K18.20 na long balus em i K24.00.

Soka - Basketbal - Ragbi - Tennis - Pising - Golp
Skwas - Daiving - Kriket.


Ol dispela samting i pulap long stua bilong mipela. Sapos yu laik baim - yu kam stret long stua bilong mipela. O sapos yu laik, yu ken salim pas i kam long mipela.

Oil Company Services Pty Ltd.,
P.O. Box 582, Wewak Telipon: 86.2373

LAIN BILONG BAL I BELHAT

(Jas 6: 1 - 30)

Bihain long ol de bilong Debora ol samting i ran gut na wantaim moa ol Isrel i lusim ting long God. Ol i stat long adorim giaman god Bal. Wan wan man tasol i no lusim ting long God tru.



Wantaim moa sampela lain stilman i raun long kantri na i bagarapim ol ples bilong ol Isrel.

Hariap ranawe.

Nogut ol i painim mi haitim kaikai we.



Bihain ol stilman i go pinis



Ol kaikai i lus pinis.

Inap seven yia ol Isrel i bagarap long han bilong ol stilman. Ol i hait long hul bilong graun na haitim kaikai nabaut. Tasol ol stilman oltaim i kam bek gen.

Nau sampela nius nogut tru i kamap

Ol Midian i kam wantaim bikpela lain pipel long hap sankamap.



Olsem ol grasop ol i raun nabaut na bagarapim ol gaden na stilim ol samting.



Wanpela de wanpela yangpela man bilong Isrel i wok long gaden na wanpela man i kamap.

Yu husat? Yu laikim wanem samting?

Gidion, God i makim yu long helpim ol Isrel.




300 MAN I NO PRET

(Jas 6: 31 - 7: 20)

God i tok na Gidion i brukim alta bilong god giaman Bal. Ol Isrel i kros, i kam long haus bilong papa bilong em na ol i laik kilim Gidion

Kaman, yumi go kisim em.

Bai mipela mekim save long em.



Nogat. Sapos Bal em i wanpela god tru, em yet inap long strafim pikinini bilong mi.

Yes, em i tru.

Sapos Bal i strafim Gidion, orait, ol Isrel i ken lukim strong bilong em

Ol Isrel i wet bai Bal i kilim Gidion. Tasol nogat. Em i stap gut. Nau ol i pilim Bal em i giaman god. Olsem nau ol i bihainim Gidion olsem lida.



Tasol Gidion i no pilim tru yet God i bin makim em. Em i askim mak long God.

Sapos long moningtaim dispela hap skin i gat wara long em na olgeta graun nabaut long em i drai, mi ken save God i bin makim mi.

Neks de long moningtaim i kamap olsem

Graun i drai tasol skin i gat wara inap long pulapim dispela plet.



Tasol Gidion i pret yet


God, yu givim mi wanpela mak moa. Dispela taim skin i mas drai na graun i mas gat wara.

Neks de long moningtaim

Skin i drai. Na graun i gat wara. Olsem mi save pinis God i laik mi bosim ol Isrel.



Mi? Mi no inap. Mi fama nating tasol. Yu gat wanem mak bilong soim mi yu ensel bilong God?



Gidion i redim sampela kaikai na bringim i kam long dispela man.



Putim kaikai antap long ston.

Long neks de Lukim, ol i brukim pinis alta bilong Bal. Bai em i kros.



Husat i mekim?

Gidion.

Orait, yumi mas kilim Gidion.... yupela kam.



Dispela man i putim stik bilong em long kaikai, na wantu paia i kirap kukim em.



Mi bin lukim ensel bilong God long ai bilong mi yet.

Bihain ensel i go pinis, God i toktok wantaim Gidion.

Long nait Gidion wantaim ol bi bilong em, i brukim alta bilong Bal.



Brukim pinis, orait, ol i sanapim wanpela alta long God.

Bikpela lain pipel i bung na i wokabaut i go long haus bilong Joas, papa bilong Gidion. Ol i belhat tru.



Mipela i laik lukim Gidion.

Pikinini bilong yu i brukim alta bilong bikpela god Bal.

Bringim i kam na mipela i kilim em.

Gidion i singautim ol lida bilong Isrel i kam.



Sapos God i helpim mipela, mipela inap rausim ol Midian long graun bilong mipela. Yupela laik helpim mi?

Yes.

Yes.

Gidion i bungim ami i gat 32,000 soldia na i mas i go long ol liklik maunten nabaut long kem bilong ol Midian.

Man, bikpela kem tru. Ol i gat moa kamel olsem wesan i stap long nambis.

Tasol maski, God i bin tokim mi, mipela i mas mekim wanem long winim ol.



Bipo em i gat 32,000 man. Nau em i gat 300 tasol. Tasol ol i save pinis God tasol inap helpim ol nau.

Haitim ol bumbum insait long ol sospen hia. Kisim ol i go raun nabaut ausait long kem. Yupela wetim mi winim biugel...

Mipela i redi.




Gidion i toktok wantaim ol soldia Sapos sampela yupela i pret orait, yupela kirap go bek long ples.



Planti i go bek, na 10,000 i stap.

Dispela lain soldia i stap yet i go daun long baret na dring. Gidion i lukim ol. Gidion i lukim sampela i putim pes i go daun na dringim wara. Arapela sampela i was i stap, i kisim wara long han na bringim i go long maus bilong ol. Dispela lain Gidion i kisim, na ol arapela em i salim i go bek long ples.



Gidion i singaut, nau ol man i winim biugel bilong ol, ol i brukim sospen, na laitim bumbum na ran i kam


Na ol dispela 300 i ran i go daun long maunten egens long planti tausien

Mipela i pait long strong bilong God.



Used by permission of the David C. Cook Foundation. Copyright 1973, David C. Cook Publishing Co. All rights reserved.

NUPELA HAUS PALAMEN



Dispela tupela poto i soim wanpela poto bilong nupela haus palamen ol i laik wokim long Port Moresby.


Ol i bin mekim wanpela resis bilong ol saveman bilong wokim ol bikpela haus olsem, na Mista Bill Phillips bilong Dipatmen bilong Wok na Saplai, i bin winim prais bilong K7,000.

Mista Phillips i tok em i laik wokim wanpela kain haus palamen we ol pipel i ken kamap isi moa na painim ol lida. I no wanpela haus i antap tumoas i gat planti plua. Nogat. Em i wanpela grup i gat kain kain haus. Wanpela i bikrum bilong ol miting, na nabaut long em i gat ol opis bilong ol memba. Na olgeta dispela haus i stap insait long wanpela naispela gaden i gat tri na plua na bilas olsem.

Na klostu olgeta samting bilong wokim dispela haus palamen i kam long Papua Niugini yet. Bai ol i yusim planti diwai long dispela haus na i no ol simen samting.

Ol bai sanapim dispela haus namel long bikpela haus kot na hap bilong nupela museum long Waigani. Dispela haus bai kostim K7,700,000 (seven milion seven handet tausen kina). Ol i ting bai em i pinis long yia 1981.

Ol man i lukim gut na i skelim ol aidia bilong nupela palamen em hia: Mista Michael Somare, Mista Dibela (Spika bilong Palamen), Sir Tei Abal, Profesa Saino bilong Yunivesiti bilong Kwinslan, na Profesa Mahoney bilong Yunivesiti bilong Teknoloji long Lae.



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.